

CUSSEGL GROND

Sessiun d'october 2023

Incumbensa Rutishauser concernent structuradas intermediaras en la tgira ed assistenza da personas attempadas

Pervia da la demografia e pervia da la mancanza da personas spezialisadas daventi pli e pli pretensius da mantegnair las structuradas da tgira e d'assistenza existentas per noss conumans pli vegls.

Sco ch'i resulta tranter auter d'in rapport da l'Observatori svizzer da sanadad (Obsan) da l'onn 2022, na crescha betg mo il basegn da prestaziuns da spitex e da plazzas en chasas da tgira, mabain er il basegn da purschidas intermediaras en la tgira da personas attempadas ed en la tgira da lunga durada fermamain ils proxims onns, e quai gist er en il Grischun.

Purschidas intermediaras sa drizzan a personas, per las qualas las prestaziuns da spitex na bastan betg, ma las qualas n'han nagina necessitad medicinala d'entrar en ina chasa da tgira.

Tar las purschidas intermediaras tutgan per exempel letgs da fin d'emna e da vacanzas. Ina incumbensa correspundenta dal deputà Degiacomi è gia vegnida acceptada dal Cussegl grond.

Ultra da questas curtas distgargias dals confamigliars dovri dentant ulteriuras purschidas supplementaras che pon vegnir utilisadas regularmain, sco per exempel l'abitar assistì ubain structuradas da di e da notg. Quai prevesa er il Model directiv grischun actual pertutgant la vegliadetgna.

E tenor il program da la Regenza 2021–2024 duain personas che assistan lur confamigliars, vegnir distgargiadas tras purschidas correspundentas. En il Grischun n'èn talas purschidas dentant strusch avant maun. Ma gist sche las personas che assistan lur confamigliars èn sezzas attempadas ubain èn occupadas pervia d'ina activitad professiunala u pervia d'autras obligaziuns, èn ellas dependentas d'in sustegn efficazi.

En il setting ambulant ston las personas pertutgadas displaschaivlamain surpigliar sezzas la gronda part dals custs d'assistenza. Uschia entran personas pertutgadas savens en ina chasa da tgira, senza che quai fiss absolutamain necessari ord vista medicinala ed er senza ch'ellas giavischan quai. Qua exista in basegn d'agir sin plaun naziunal.

L'Obsan porscha als chantuns in model da prognosa differenzià, ch'è coordinà cun las relaziuns e las necessitads chantunalas specificas.

Las sutsegnadras ed ils sutsegnaders incumbenseschan la Regenza da preschentar – sin basa da las datas existentas – las structuradas da provediment ch'èn necessarias en l'avegnir per il Grischun. A medem temp duai vegnir mussà, co ch'il basegn da purschidas intermediaras pudess vegnir ademplì e co che la finanziaziun pudess vesair ora.

Cuira, ils 18 d'october 2023

Rutishauser, Holzinger-Loretz, Beeli, Bachmann, Bardill, Baselgia, Biert, Bischof, Bisculm Jörg, Bleuler-Jenny, Cahenzli-Philipp, Degiacomi, Dietrich, Furger, Gansner, Gartmann-Albin, Gianelli, Gredig, Hoch, Kaiser, Kreiliger, Mani, Mazzetta, Müller, Negretti, Nicolay (Bever), Perl, Preisig, Rettich, Rusch Nigg, Said Bucher, Spagnolatti, Walser